

**Fadú atá beartaithe ar an Rialachán Blocdhíolúine do Mhótarfheithiclí agus  
nuashonruithe ar na Treoirlínte Forlíontacha  
Nóta míniúcháin**

---

## **1. RÉAMHRÁ**

In Iúil 2022, d'fhoilsigh an Coimisiún dréacht-Rialachán chun aiseolas a fháil ón bpobal, ar dréacht-Rialachán é lena gcuirtear síneadh le tréimhse bailíochta Rialachán 461/2010 ('MVBÉR'),<sup>1</sup> mar aon le dréacht-Teachtairacht lena leasaítear an Fógra ón gCoimisiún ina bhfuil na Treoirlínte Forlíontacha ('SGL')<sup>2</sup>. Léirítear sa dá dhréacht sin na hathruithe a bheartaíonn an Coimisiún a chur chun feidhme tar éis dó meastóireacht a dhéanamh ar chóras MVBÉR,<sup>3</sup> a bhfuil na torthaí leagtha amach sa Tuarascáil Mheastóireachta,<sup>4</sup> mar aon leis an Doiciméad Inmheánach Oibre de chuid an Choimisiúin,<sup>5</sup> ar foilsíodh iad araon an 28 Bealtaine 2021.

Na comhaontuithe ingearacha a bhaineann leis na coinníollacha faoina bhféadfaidh páirtithe páirteanna spártha a cheannach, a dhíol nó a athdhíol nó seirbhísí deisithe agus cothabhála a sholáthar le haghaidh mótarfheithiclí, díolmhaítear iad le MVBÉR ó chur i bhfeidhm Airteagal 101(1) den Chonradh, faoi réir teorainneacha áirithe. Leagadh amach le SGL prionsabail chun measúnú a dhéanamh, faoi Airteagal 101 den Chonradh, ar shaincheisteanna áirithe a thagann chun cinn i gcomhthéacs na gcomhaontuithe sin.

Ar an iomlán, léiríodh sa mheastóireacht a tugadh i gcrích an 28 Bealtaine 2021 go raibh córas MVBÉR úsáideach agus go raibh sé fós ábhartha do na páirtithe leasmhara. Léiríodh sa mheastóireacht freisin, cé gur dócha go dtiocfadh forás ar mhargadh na mótarfheithiclí sna blianta amach romhainn, nach raibh aon fhorbairt ábhartha ann le deich mbliana anuas a thabharfadh údar le hathbhreithniú mór ar chóras MVBÉR. Tugadh le fios sa mheastóireacht, áfach, go raibh gá le nuashonrú a dhéanamh chun an tábhacht a bhaineann le rochtain ar shonraí feithicil-ghinte mar ghné den iomaíocht a léiriú.

I bhfianaise na dtorthaí sin, tá sé beartaithe ag an gCoimisiún an méid seo a leanas a dhéanamh: (i) síneadh cúig bliana a chur le fad MVBÉR (i.e. go dtí an 31 Bealtaine 2028); agus (ii) nuashonruithe beaga spriocdhírithe a thabhairt isteach in SGL.

## **2. NA DRÉACHTRIALACHA ATÁ BEARTAITHE**

---

<sup>1</sup> Rialachán (AE) Uimh. 461/2010 ón gCoimisiún an 27 Bealtaine 2010 maidir le cur i bhfeidhm Airteagal 101(3) den Chonradh ar Fheidhmiú an Aontais Eorpaigh maidir le haicmí comhaontuithe ingearacha agus cleachtas comhbheartaithe san earnáil mótarfheithiclí (IO L 129, 28.5.2010, lch. 52).

<sup>2</sup> Fógra ón gCoimisiún dar teideal 'Treoirlínte forlíontacha maidir le srianta ingearacha i gcomhaontuithe chun mótarfheithiclí a dhíol agus a dheisiú agus chun páirteanna spártha a dháileadh le haghaidh mótarfheithiclí' (IO C 138, 28.5.2010, lch. 16).

<sup>3</sup> Is éard atá i gcóras MVBÉR: (i) an Rialachán Ingearach Blocdhíolúine ('VBER') agus na Treoirlínte maidir le Srianta Ingearacha ('VGL'); agus (ii) na forálacha earnáilsonracha blocdhíolúine, dá bhforáiltear in MVBÉR agus SGL, ar forálacha iad is infheidhme maidir le dáileadh páirteanna spártha le haghaidh mótarfheithiclí agus seirbhísí deisithe agus cothabhála le haghaidh mótarfheithiclí.

<sup>4</sup> COM(2021) 264 final.

<sup>5</sup> SWD(2021) 112 final.

#### **a. Dréacht-Rialachán lena gcuirtear síneadh le bailíocht MVB**

Léiríodh sa mheastóireacht cé nach raibh athrú mór tagtha ar an timpeallacht iomaíoch i margaí na mótarfeithiclí ó bhí 2010 ann, go raibh brú ar an earnáil dul in oiriúint do na nithe seo a leanas: (i) éabhlóid na teicneolaíochta, lena n-áirítear tábhacht mhéadaitheach na sonraí feithicil-ghinte; (ii) an brú leanúnach chun astaíochtaí a laghdú, agus aistriú go dtí breoslaí agus gléasraí cumhachta atá níos neamhdhíobhálaí don chomhshaol; agus (iii) athruithe i bpatrúin soghluaisteachta. Thángthas ar an gconclúid sa mheastóireacht, mar thoradh air sin, go dtiocfadh athrú gasta ar chodanna áirithe den earnáil sna blianta amach romhainn agus go mbeadh tionchar aige sin (nach bhfuil inchainníochtaithe go fóill) ar na dálaí iomaíochta. Roinnt de na hathruithe atá ag teacht chun cinn anois, táthar ag súil leis gur láidre fós a bheidh siad idir 2025 agus 2030.

Sa chomhthéacs sin, tá sé beartaithe ag an gCoimisiún síneadh cúig bliana a chur le MVB atá ann faoi láthair. Leis sin, beifear in ann cuid de na hathruithe atá ag teacht chun cinn a chomhdhlúthú agus cuirfear ar chumas an Choimisiúin an staid a athmheasúnú faoi réaltacht nua an mhargaidh.

Dá bhrí sin, tá dréacht-Rialachán ón gCoimisiún lena leasaítear MVB maidir lena raon ama á mholadh ag an gCoimisiún: eadhon síneadh a chur lena bhailíocht go dtí an 31 Bealtaine 2028. Ag an am céanna, tá an Coimisiún ag moladh go dtabharfar isteach oibleagáid athnuaite maidir le faireachán a dhéanamh ar MVB agus meastóireacht a dhéanamh air sula rachaidh sé in éag, i gcomhréir leis na Treoirí maidir le Rialáil Níos Fearr<sup>6</sup>.

Níl aon athrú eile beartaithe ar an Rialachán atá ann cheana.

#### **b. Dréacht-Teachtairacht lena leasaítear SGL**

Faoi láthair, cé go dtéitear i ngleic go mion in SGL leis na prionsabail iomaíochta is infheidhme faoi Airteagal 101 den Chonradh maidir le príomh-ionchuir eile ó thaobh deisiú feithiclí de, amhail uirlisí, oiliúint, agus faisnéis theicniúil, níl tagairt shainráite ann do shonraí feithicil-ghinte.

Ós rud é gur léiríodh sa mheastóireacht go raibh gá nuashonrú a dhéanamh chun an tábhacht a bhaineann le rochtain ar shonraí feithicil-ghinte mar ghné den iomaíocht a léiriú, leathnaítear leis an dréacht-Teachtairacht na prionsabail atá i bhfeidhm cheana féin maidir le soláthar faisnéise teicniúla, uirlisí agus oiliúna, ionas go gcumhdófar leo go sainráite sonraí feithicil-ghinte a bhfuil gá leo chun seirbhísí deisithe agus cothabhála a sholáthar. Tabharfaidh na hathruithe sin soiléireacht do chuideachtaí maidir leis an tuairim atá ag an gCoimisiún faoi fhadhbanna maidir le rochtain ar shonraí feithicil-ghinte agus measúnú á dhéanamh ar chomhaontuithe ingearacha idir monaróirí feithiclí agus a líonraí údaráithe faoi Airteagal 101 den Chonradh. Cuirtear na hathruithe sin chun feidhme trí na leasuithe atá beartaithe ar mhíreanna 60 go 68 de SGL atá ann faoi láthair.

Sa bhreis ar an méid thuas, tugtar isteach leis an dréacht-Teachtairacht nuashonruithe ar na tagairtí dlíthiúla atá san áireamh in SGL, eadhon tríd an méid seo a leanas a dhéanamh: (i) na crostagairtí do VBER agus VGL a nuashonrú leis na tagairtí iomchuí do na téacsanna nua a ghabhfaidh ina n-ionad; (ii) inneachar mhíreanna áirithe SGL a ailíniú le forálacha VBER agus VGL nua; agus (iii) crostagairtí don reachtaíocht laistigh de shainchúram AS GROW a

---

<sup>6</sup> Féach Caibidil III de na [Treoirí maidir le Rialáil Níos Fearr](#) agus [Uirlis #44](#) den bhosca uirlisí um Rialáil Níos Fearr 2021.

nuashonrú, ar reachtaíocht í a bhfuil téacsanna nua curtha ina hionad nó atá aisghairthe. Áiríteoidh na nuashonruithe sin comhsheasmhacht sna hionstraimí beartais ábhartha ar fad agus cabhróidh siad le páirtithe leasmhara SGL a chur i bhfeidhm.